

Ta med levekårsutsette område i barnehagesatsinga!

Regjeringa har foreslått i statsbudsjettet for 2024 at maksprisen i barnehagar frå 01.08.2024 skal settast ned til 2000 kr i heile landet. I dei aller minst sentrale kommunane skal dessutan prisen ned heilt til 1500 kr. Regjeringa har ikkje foreslått noko til å auke bemanninga i barnehagar.

SV har alltid kjempa for lågare barnehageprisar. Vi er glade for at regjeringa nå tar grep på dette området. Lågare barnehageprisar for alle er ekstra viktig i ei tid kor rentesjokk og dyrtid trugar vanlege folk sine levekår og kjøpekraft. Å sette prisane ekstra lågt i dei aller minst sentrale kommunane er i utgangspunktet fornuftig, fordi det er eit viktig mål for Noreg å halde oppe folketalet i dette området.

Derimot meiner SV at det er kunstig at ikkje også dei områda i Noreg med størst opphoping av levekårsutfordringar blir ein del av den lågaste makspris-satsen. I tillegg er det problematisk at regjeringa ikkje i tillegg gjer meir for å styrke kvaliteten i barnehagar gjennom auka bemanning i levekårsutsette område. Gjennom Meld. St. 28 (2022-2023) har regjeringa nyleg satt fokus på ei urovekkande opphoping av levekårsutfordringar i bydelar i mange norske storbyar. Det handlar om inntektsnivå, utdanningsnivå og om at mange med dårlege norskferdigheiter bur her. Samstundes held meldinga fram at barnehagesatsing er eit viktig tiltak for ungene som veks opp her. Sjølv om dei fleste ungene også i desse områda går i barnehage, viser tala at ungar med minoritetsbakgrunn startar seinare og går kortare i barnehage enn andre ungar.

I dag er det områdesatsingar med statleg delfinansiering i Groruddalen, Oslo sør, Grønland og Tøyen, i tillegg til utsette bydelar i Trondheim, Bergen, Stavanger og Drammen. Fleire andre er under oppsegling.

Frå 2007 til 2014 var det ei ordning med gratis kjernetid, i praksis halv pris på barnehageplass i bydelane i Groruddalen og Søndre Nordstrand. Det førde til at mange fleire barn gjekk i barnehagen. Følgjeforskinga på dette viser gode resultat, ved at barna som var ein del av denne ordninga gjer det betre på skulen enn ungar med lik bakgrunn som ikkje var det. Dette viser at prisen påverkar barnehagedeltakinga, og at barnehagedeltaking påverkar korleis det går på skulen og kva moglegheiter ungene får vidare i livet.

I Hurdalsplattforma skriv regjeringspartia at dei vil «styrke satsingen på barnehage i områder med integrerings-, språk- og levekårsutfordringer». Til no har dei berre løyva 35 millionar kroner til dette, og 15 av desse millionane var det SV som sørgra for i forliket om statsbudsjett for 2022. For at satsinga ikkje skal stoppe opp må satsinga styrkast og vidareførast.

Oslo SV meiner derfor at SV gjennom forhandlingane om statsbudsjett må ta kampen for at dei områda som har statlege områdesatsingar også skal komma inn under den lågaste makspris satsen og få auka bemanning i barnehagane. Viss det er nokon som treng ekstra låge barnehageprisar og fleire trygge tilsette på jobb, er det ungene som veks opp her.